



Abraham fait deuoir de sacrifier Isaac son fils , ainsi que Dieu luy auoit commandé ; lequel se contenta de son obeyssance.

ET apres ces choses Dieu tenta Abraham, & luy dit; Prends ton fils vnique Isaac , lequel tu aimes , & t'en va en la terre de vision, & l'offre là en holocauste sur vne des montagnes que ie te monstreray. Abraham print deux seruiteurs, avec Isaac son fils, & ayant chargé vn asne de tout ce qu'il leur falloit, s'en alla au lieu que Dieu luy auoit dit : & au troisieme iour Abraham vid le lieu de loin , & dit à ses seruiteurs, Arrestez-vous icy avec l'asne , & moy & l'enfant irons adorer, & retournerons. Abraham charge le bois sur l'enfant, & il portoit le feu & le glaiue, & ils s'en allerent ensemble : & Isaac dit à Abraham, Mon pere, voicy le feu & le bois , mais où est le sacrifice pour l'holocauste ; Abraham respond, Mon fils, Dieu y pouruira. Eux estans au lieu, Abraham édifia vn Autel, ordonna le bois, & lia Isaac son fils, & le mit sur l'Autel par dessus le bois ; & aduançant sa main ayant le glaiue pour immoler Isaac son fils, lors l'Ange du Seigneur cria du Ciel, Abraham, Abraham , tu ne mettras point ta main sur l'enfant, & ne luy feras aucune chose : car i'ay connu ton cœur , n'ayant épargné ton fils vnique , duquel la posterité sera innombrable.